

Kerwespruch 2011

Woann de Quetschekucheduft sich im Ort verbreit'
unn die Kersch die Kerb oileit,
doann is es endlich wirrer soweit:
in Worfelle is Kerwezeit.

Unn weil die Kerb is immer schee
geht ein jeder aach gern hee.
Zum Feiern, bis die Balke krache,
zum Singe, Saufe, Doanze, Lache.

Goanz Worfelle ziehts wirrer naus
in unser scheenes Bürgerhaus.
De Zimo zappt unn macht koa Bosse
- woann mir dort die Sau raus loasse!

Die Worfeller Kerb muss oafach soi
drum steigt ins erste Lied mit oi
mer singe zoamme unn soin froh:
„Die Worfeller Kerb is wirrer do“.

Ihr Beivädder loasst mich als schwätze,
moi Zung, die hängt mer schun in Fetze.
Ich trink jetz oan uff eich ehr Leit,
unn beginn doann mit de erste Peinlichkeit.

1. Streich

Gewinne, des dud jeder gern
denn alle wolle Erster wern!
Unn groad beim Fußball - des is rischdisch -
is es Gewinne ziemlich wischdisch.

Doch leider klappts net immer so
unn aach's Verliern is doann mol dro.
So soin unser Fußballer - ich will net lieje-
diesjoahr leider net uffgestieje.

Woanns doann kimmt zum letzte Speel
zählt die Moral so rischdisch veel.
Drum hoann se alle ihre Kraft
in des Speel enoi geschafft.

Oam Enn kunnts leider doch net loange
unn die Kepp hoann dief gehoange.
Doch oaner ehrt sich goanz besonnens
unn sucht sich's Opfer glei woanners.

Es Scheckers ehrn Tim ehrt sich mit,
voller Frust er geje de Doorposte tritt.
Doch woas sich jeder denke dud:
so en Tritt, der dud net gut!

De Fuß werd uff de Stell stahlblau
unn stiehlt em goanze Speel die Schau.
Ihr hoabts all sicher schun geroche -
em Tim soin Fuß is nadierlich gebroche.

Drum soach ich dir moin liewe Bub:
jeder mol verliere dud!
Des dud im erste Moment zwar weh;
awwer net so schlimm wie en gebrochene Zeh!

Damit des netmeh goanz so schmerzt
werste jetz mit em Lied verarzt.
Singt all mit, denn des is schee:
„Woann ich mojends vun de Kerb hoam geh“

2. Streich

Unn weiter geht's in froher Runde
mit de nächste Kerwekunde:
Ich soachs eich all minoanner glei:
en Fuß is aach wirrer debei!

Die Ute Kroiß, die is bekoannt
in unserm Derfsche uff em Loand.
Diesjoahr hatt se goanz famos
en Geburtsdoach, der war riesegroß!
(Isch glaab es war de dreißischste)

Unn woann mer die Gäste alle zähle
derf aach de Harald nadierlich net fehle.
Der war an dem Owend schun gut debei
unn schenkt' sich als wirrer oaner oi.

Irgendwoann zu später Stunde
wars nur noch e klenner Runde
Unn die letzte beiden Gäste
tranke um die letzte Reste.

De Harald unn de Schmalze Dieter
sanke mehrmols auf unn nieder.
Sie kunnte beide netmeh steh
unn koaner wollt Nochsusch holle geh.

So hann se ziemlich schnell de Ploan:
wer net laafe koann muss fahrn!
Ab ins Auto mit veel Gas
in die Druckkoammer gerast.

So weit so gut, goanz ohne Probleme
bis jetz brauch sich noch koaner schäme.
Doch als es doann schun loangsoam hell
wollte beide hoam goanz schnell.

Unn weil jetz koaner kunnt meh fahrn
es Taxi war de nächste Ploan.
„Fahrer, in die Moselstrooß,
mach net rum, fahr endlich los!“

Beim Aussteije is es doann bassiert,
de Harald hoat sich net pressiert.
Unn weil im Taxi tickt die Uhr
de Fahrer schunmol weiterfuhr.

Ehr kennt eich denke woas war los,
de Zores unn die Schmerze groß.
Es Taxi is mit veel Elan
em Harald iwwern Fuß gefahrn!

Doch weils vorausschauende Leit,
de Harald war schun längst betäubt!
Unn erst nooch komatösem Schläfe
die Schmerze ihn so rischdisch trafe.

So kunnte sich die Nochbersleit,
- ehr erinnert eich sicher an de Tim aus de erste Peinlichkeit -
in Gere im Kroankehaus, unn des sin koa Bosse,
Mengerabatt uff Gipsbinne gewwe loasse.

Loasst eich gesoad soi fer alle Zeit
geht liewer frieher hoam ehr Leit.
Stimmt all mit oi un steht parat
woanns glei haaßt: „Prost Prost Kamerad!“

3. Streich

In de Emil-Hieke-Strooß
is es goanze Joahr woas los.
Woas ich eich jetz glei berischt
is die allerneist Geschischt.

Es gibt e Haus in dere Gass
do stehn die Autos in oaner Mass.
De Hölzel durfte - welche Ehre
em Opa Rühl soi Auto zum Toanke führe.

Damit es Geld aach sicher loangt
er gewitzt es billischste toankt.
Doch nooch de Hälf' kimmt em en Gedoanke:
„Net jed Audo derf es billischste toanke...“

Drum hoat er reagiert blitzschnell,
unn zieht de Rüssel uff de Stell.
„Verdoammt, des Audo brauch Benzin
sunst is de Motor goanz schnell hin.“

Er is jo jetz koan kloane Dumme
unn hot sich schnell nochmol besunne.
„Woann ich noch schnell Benzin druffschitt,
kriegt des Maleer koan oane mit.“

Goanz stolz uff diese mortz Idee
wollt er losfahn schnell unn schee.
Doch logisch war de Ärger groß:
des bleede Auto fuhr net los.

De Toankwart kam zu Hilf gerennt
hoat em die Werkstatt glei genennt.
Die hoann des Auto schnell geholt
unn in die Werkstatt noi gerollt.

Die Rechnung war oam End famos
unn de Krach war riesegroß.
Drum biste zum Laafe net so willisch,
toank lieber rischdisch - net nur billisch!

Mir singe all fer dich, du Held
„Wer soll des bezoahle - wer hoat des bestellt?“

Moi Zung die hängt oam Gaume fest,
die Hitz hier gibt mer noch de Rest,
Beivädder schenkt mer oaner oi
vun dem kiehle Kerwewoi.

4. Streich

Des bissje Haushalt macht sich vun alloa, seegt moin Moann.....
ein jeder dieses Liedsche koann!
Drum wollemer jetzt net loang singe
unn die nächst Geschischt glei bringe.

Unser Bina is bekoannt
als Hoandballerin im goanze Loand.
Doch schmeiße koann se net nur Bäll
aach im Haushalt is se schnell!

Drum is es diesjoahr vorgekumme,
die Bina sich woas vorge numme:
Im Kiehlschroank, wie ein jeder weiß,
soammelt sich aach gern mol Eis.

Zum oabtaue brauch mer veel Zeit,
doch net die Bina - basst uff ehr Leit:
Im gude Haushalt jeder hoat,
en Werkzeischkoffer stets parat.

Nooch em korze Blick enoi,
fällt de Hausfraa glei woas oi.
„Mit Hoammer unn Meißel, des wär doch gelacht
werd der Kiehlschroank kalt gemacht“.

Unn weil die Bina net loang fackelt
werd mol korz mim Hoammer gewackelt.
Mim Meißel fühlt mer sich goanz frei
do war des Eis goanz schnell entzwei

De Erfolg war optisch rießegroß,
es Eis war die Bina ruckzuck los.
Doch leider uff de zweite Blick
de Kiehlschroank hoat gespeelt net mit.

Er hoat noch oamol korz gezuckt
unn net meh loang erumgemuckt.
En korze Piff unn doann wars aus
jetzt gibt's koan Kiehlschroank meh im Haus.

Unn die Moral vun der Geschischt:
Geduld schoad de beste Hausfraa nicht!
Damit die Kisch werd wirrer schee
singe mer fer dich: „Ja woann die Poanneflicker reise geh“

5. Streich

Damit mer all schee feiern kenne,
misse moi Buwe goanz schee renne.
Unn zu allem Iwwerfluss
mer jed Woch uff e Sitzung muss.

Woann die Sitzung doann zu End,
werd sicher net glei hoamgerennt.
So isses bei uns meistens üblich,
dass mer zusammehockt gemietlich.

Es folgt die kreative Phase
mit masseweiß Gedoankeblase.
Unn so manche Schnapsidee
reift im Hern so rischdisch schee.

So doacht sich unsern Fabian:
„Mir is so kalt, woas mach ich doann?
Entwerrer geh ich hoam ins Bett,
e Feiersche wär awwer aach goanz nett“

Er warf soin Vorschloach in die Runde,
e paar Mitstreiter warn glei gefunde.
Unn weil e Feier drin net brennt,
sin se gemeinsam losgerennt.

Ruck zuck unn mit goanz veel Stolz
klaute se unnerwegs noch Holz
So kame schließlich unser Noase
oo, uff em goanz heilische Roase.

Ehr liewe Leit, noch kennt ehr wette
es lag koan Wert uff Etikette.
Doch wie ehr eich schun denke kennt
es Feiersche im Golfpark brennt.

Net nur die Stimmung war famos,
aach es Feier riesegroß.
Moi Buwe warn so rischdisch froh:
de Bachgrund brannte lichterloh.

Sie bliewe net loang unentdeckt
die Nochbern warn schun uffgeschreckt.
Die Polizei war aach schun da
mit Blaulicht und Tatütata.

Nun saaße se dort goanz gemietlich
unn eigentlich aach ziemlich friedlich,
de Spaß war allerdings vorbei,
verdeutlichte die Polizei.

Sie leerte noch goanz fix ihr Bier
unn musste direkt uffs Revier.
Dort hoan se kriegt fer diese Tat
e Stroof die sich gewäsche hoat!

Oans muss ich eich awwer loasse
ich hätt nix zu erzähle ohne eier Bosse!
Unn die Moral vun der Geschicht:
En Golfplatz unn Feier vertroache sich nicht.

Moin letzte Satz, doann her ich uff,
Stabführer, de Kerwemarsch jetz druff!
All singe mit unn soin rischdisch froh
woanns haaßt: „Die Worfeller Kerb is do!“